

宋代蜀文輯存

傅增湘編



宋代蜀文輯存

5

傅增湘編

北京圖書館出版社

目次

卷八十一 第一册	六八一
凡例	一
作者索引	一
序 傅增湘	五
序 孫鴻猷	一九
序 周玉柄	二三
讀《宋代蜀文輯存》書後 蕭方駿	二七
作者總目	三一
引用書目	五九
作者考	八五
卷一—卷十一	一四七

第二册

卷十二——卷二十四

第三册

卷二十五——卷三十九

第四册

卷四十——卷五十四

第五册

卷五十五——卷六十九

第六册

卷七十——卷八十四

第七册

卷八十五——卷一百

續補

六八一

目次

宋代蜀文輯存卷第五十五目錄

劉望之二十九首

八陣臺賦

上皇帝十事書

庚午省闈唱和詩序

上秦丞相書

上沈丞相書

上万俟丞相書

上張子功尚書書

賀劉丞相啓

賀詹察判啓

除館職謝宰相啓



上提刑小簡

上都運咨目

上丞相小簡

乾龍節道場疏

天申節功德疏

天申節功德疏

天申節錫宴致語

生辰致語

卷五十五目錄

宋代蜀文輯存卷第五十五目錄終

宋代蜀文輯存卷第五十五

江安傅增湘編輯

長壽孫鴻猷校訂

劉望之二十九首

八陣臺賦

蜀藝文志卷二上

余與客登夔子城望八陣圖感忠武侯之行事恨世議者之弗獲於斯也作賦以悲之其辭曰

竊孤臺之巖然臨千步之沙場石離離其班班紛栖雁之未翔山暝黑而更惡水雖波而不揚澹徙倚其不去含鬱紆之內傷是何以使之然哉客或告之在漢之亡有人超然臥鄧南陽甚似阿衡樂未渠央感大耳之至意姑黽俛而徂征又侶子房初未有意隆準之老也及其既作亦不能已手胼足胝夙夜赤子忽一龍與一蛇蓋亦未可以優劣計大兵初來雷電下空璋孱小兒孰嬰我鋒



駐師江郊坐向必東蒐我卒乘取彼凶殘中原有狐憑陵宮垣我不往取高帝在天衆謂卯金之不可相而况夫子之賢也運去道窮嘔血繼之非公實患愚者不知自古聖賢亦行其義道之不濟已知之矣相夫子之所立固已無窮而不貲彼丕操父子烏雀犬彘之竊食雖甚饜而不免其驚疑愍世俗之隘陋徒顧瞻而涕洟請舉酒以酌公混一笑於江糜

上皇帝十事書

名賢文粹卷一百六十七

臣世出穎昌陽翟之籍自西南來有見天地順豫日月清明挈提妻孥親光上國啟行之日親友舉酒相屬曰見而不言或言而不盡無入吾邑臣飲其酒受其言報曰不敢既至國門陛下過聽召臣使入侍見之日天語垂賁一言千鈞臣實不任有此大惠感極涕霑繼蒙除吏上庠待罪策府恩紀頻煩重以夙志抱二宜言年今三十矣佻佻俯首日就舖啜老病有期趣志無幾常恐卒爲仁人義夫之所指笑孤負聖世汙辱善類隳其先人昔者國之有大事外朝以聽

下至庶士皆得預議非獨盡小大之情防偏係之見所以示優恤安遠邇也恭惟陛下嚴恭寅畏實勤實勞居百王之先富貴崇高自奉自養處衆人之後方此宵旰惟懷永圖計安天下憂見顏色有君如此誰忍負之臣儻有重於言以諱爲解茲謂自誣吾君皇天后土去人不遠臣罪莫逃是用妄發以復前語臣誠惶誠恐死罪死罪謹列十事冒犯神威其一曰明主勢臣非謂是閹閹慘舒有未至也伏以人主之勢與凡人異經曰王言如絲其出如綸王言如綸其出如紉非謬語也天下仰望人主尊崇如天上帝界付人主親信如子天之命畏不敢逃子之欲愛不敢拂况命之義欲之正出言果可如影響舉意果可如著龜甚順甚利甚敏甚捷豈若凡人左右經營終日籌度常憂不濟自古帝王出令諄複常亦慮其不諧不知謀之苟臧持之苟確金石爲開鬼神爲避匹夫庶士一言一行暫中機會卿相可折三軍可却况夫人主擁天地神靈之祐席祖宗社稷之慶挾公卿大夫之助倚百姓愛戴之情何況而不遂何求而不成臣

愚誠見陛下盛德謙抑久而若未遑暇故不勝懇款首願以此爲贊也其二曰
起士氣士大夫不患無才而其才患無所發不患無智而患其智匿伏而不肯
見今舜趣禹蹈爲何等時士風奄奄至此臣寔憂之臣之所憂不在無事之時
而在緩急使人之際不在緩急使人之際而在倉卒不可收攝控御之日於此
而後君子小人之天出矣今年三月二十五日面對之章臣嘗略爲陛下及此
不知聖主頗憶之否士風脂韋汨沒非適今茲稠人廣衆稍自激昂已蒙側目
旋得譏刺指爲好名或曰沽激又曰狂狷夫士之自待誠不得指此以爲封疆
至於上之人以厲世磨鈍寔宜用是以爲砭劑陛下幸觀生民以來無欲而好
仁一世幾輩臣常論之彼好名則必畏物議彼沽激則必強爲善不狂狷雖非
中道必不肯瘖瘖自愛坐視人疾設更俛引其辜當以出位則是匍匐入井之
子非不親戚皆可無救而謂宜也無乃亦將悔之况今日之病對證用藥雅宜
在此臣吏國學日諸生有玉質者爲臣言亦同此憂質之言曰今人便憂獎用

介直激爲狂怪正似病痿之人未能起立已遽憂其馳突不已不五十年後此語不可出也斯言有理臣每奇之今乃得爲聖主誦之其三曰辨國體傳曰師克在和不在衆老子曰抗兵相加則哀者勝此言得道之與失道而愛人之與害人也使自古及今天道有兩人情或二斯言毋從不然臣見此事噉噉似日星耳今者人間汹汹多言北人窺室河南勢焰逼近將生大憂此固不可不慮然臣聞之涉江海者忘水之危而後見水臣愚願爲陛下一言虜之不必畏者三國時劉備用蜀孫權用吳號爲猿臂以抗曹氏其實陽合陰離一國而含二憂孰與今日東西萬里父子一家均攻共守不俟結約此不必畏一也曹操陰狡多謀善撫士卒兵鋒所至如割菅葦以彼較操曷能及之此不必畏二也夫以區區煨燼之漢威靈殘闕之餘元德宗室疎屬猶能窄操而奪之氣孰與國家一祖七宗德澤在人陛下恭儉勞謙約以利世虛心求治信順所格憑藉多矣此不必畏三也或曰士卒久墮將帥久逸何如國家初渡江時擇人統之臨

以公平結以恩信義勇所激化辱爲強此不必畏四也獨財用一事誠似厯厯
臣亦以爲勿憂之過祖宗得天下收版圖幾何南征北伐未聞以財爲恨何者
物不妄費故供者無愁急而後取故知者必察天下皆知爲已取爲已費也今
無事故已設有所營雖使卜式輸半家之財蕭何調關中之食以佐縣官無不
可矣臣仰窺陛下清淨無欲身居法宮不事宴遊讀書結字之外無佗帝王嗜
好一分以義制心道之至難陛下親以其身踐之如席肯復更爲他人徒有橫
費天下亦知國家惟正之供孰不欣然赴義如渴此不足畏五也乃若人間之
憂殆亦有故治平既久如道行之人方息美蔭勸之命駕意必不樂既行之後
有何大苦陛下天下之心也莊子曰一心定而萬物服陛下之室家也詩曰雖
則劬勞其究安宅臣不勝區區願君父寬而圖之其四曰廣信任臣聞國之用
財猶醫之用藥補瀉相資悍良相持畏惡相制服之惟安乃久無患未有反此
而無過者漢高帝曰王陵少戇其以陳平助之又疑平詐復曰其以周勃鎮之

此合三物成一劑也施之異日果如其言太祖皇帝兼用曹彬潘美聖度正如
此耳蓋鹽梅水火交濟之外又有三物一則方事之虞不畏則驕必圖所以能
督之者二則鵬鳩之愛固欲其均一也三則方有不諱即有可代之人唐憲宗
時以高崇文伐劉闢卯受命而已出師可謂忠矣杜黃裳獨慮之使人謂崇文
戰若不力當以劉濼代公於是濼爲崇文所憚一戰禽闢夫豈嘗謂崇文之不
忠也平日可保猶當慮其見險而辭有功則驕當預有以制之此昔人更事多
處也賈復與光武有河北周旋之舊恩許婚姻天下大事惟鄧禹李通與復三
人得與參決其寵劇矣殆復以私怨睥睨寇恂光武正色責以大義復固焯焯
敢不頓首奉命爲謹然則侍衛功臣均其眷用惟我所欲剛明一奮誰敢不承
詩曰二矛重弓說者以爲備折毀也器械資生之具今人尙儲其副以爲備豫
况於人材可復求之一旦倉卒之間古人問後問繼多於平常從容之時不以
爲惡忠臣義士亦有舉親舉儲之對二者深爲社稷之計然也臣願陛下推二

祖參用人材之方考光武兼制寇賈二子之義察古人問後問繼之意衆建其曹以相臨攝各令薦引無萃一門孰爲可以大用孰爲可以兼收孰長推鋒孰善堅壁優於策者何人勇於鬪者何校必出公義實可厭衆一材一技俾具所知實跡以聞陛下大則參以朝廷羣臣之論次則採以來覲迭對遠邇之評然後召見便殿親加物色賜以展盡以其所聞驗以所見審如薦語隨宜用之此祖宗攬收威權駕御將帥親得其人使歸心人主之術也至於可代大將一事臣夙夜念之竊冒最宜注意今侍衛爪牙不無老宿陛下日所親見不待臣言自蜀來聞吳璘多病日服金石二三百粒其兄玠爲方士誤今璘又陷其轍田師中亦旣且老劉琦文武忠謹老翁稚子聞名皆喜問其年貌皆有憂色今六十餘矣近亦大病瀕死此數人者陛下豈可不預爲之謀陛下不以臣言爲過願下明詔凡稱大將使如今之侍從少增其員舉自代三人或更多不禁以備採訪審擇此誠當今之急務臣不勝拳拳望陛下圖之其五曰示好惡臣聞之

記曰下之事上不從其令從其所行上好是物下必有甚焉者矣故曰好賢如
緇衣言其願爲之製衣願爲之受餐反復篤至勤懇之甚也曰惡惡如巷伯言
其欲投之豺虎欲投之有北欲投之有昊掃除懲艾息滅之至也以爲不如此
賢者將有蘊而不盡小人繆結扞格者終不能禁故古之人君見一善必喜之
必用之又從勤勤稱道以昭明之使天下咸知吾之所好者在是也見一不善
必怒之必去之又從而詆誚沮抑以暴揚之使天下咸知吾之所惡者在是也
好惡已明而後天下之心有所係着善者益以善而不善者亦將遷革變易以
赴上之所欲人情願得用與稱道而不願得疎斥暴揚其惡矐然也臣雖賤且
疎妄有以知陛下所好必忠直所惡必佞邪所好必勵勤所惡必弛怠所好必
利人所惡必暴物所好必公方所惡必私徇所好必忠厚所惡必刻薄所好必
孤立所惡必朋邪所好必自守所惡必交通所好必自坦途中來所惡必由隱
闡入入臣愚不知大夫士何用不察聖意裴徊傍徨且前且却若有所畏而不

敢近恭惟陛下膺受大寶于今幾年何嘗聞以忠鯁輕咎一士大夫士其忍妄量吾君至此可不可也雖然子之不肖父母官愍憐而教道之此在陛下而已彼能有所陳也臣願陛下少加詳復以盡其意彼有所不敢也臣願陛下特賜叩發以開其端使各以所聞敷奏於前陛下因其所能明試於後正邪忠佞入陛下衡石尺度之中不差一毫芒矣然後隨其美惡暴之揚之使天下了然皆悉盛大之指所在孰不自竭以盡其能書曰王播告之修不匿厥旨荀子曰王道利宣不利周此言陛下學海中一漚洙也其六曰核總覽比數年來陛下益爲勵精躬覽庶政進退人材皆自上出一時人物森布朝廷天下歌舞之臣猶敢區區復爲陛下謀其將來誠出於憂不敢爲妄臣仰觀陛下誕受皇天之所眷佑實以聖子起自艱難夏之少康商之高宗漢之宣帝異轍同羈勒所至入之情僞物之機括變化隱恣莫不周知是以作其即位大明一照幽蔀畢出加之天資恭儉慈愛知人疾苦虛心聽納人用展盡樂於上聞事無巨細指圖觀

象了了不欺施之總覽何道不臧是以一時人物不試可用以其周旋險阻之時諳之素也中更姦人此事幾撓屬者陛下大明黜陟竄姪奸回收召逐客所用固多曩時亮直得過藁夫之人烈火既試玉石誠驗陛下收而攻之雕斲藻藉隨材器使總覽之道誠恢恢矣臣所謂願爲陛下議其將來者良以世事無盡人材有時今者陛下夙駕而朝鳴蹕而入人士進退班列有序自外初來者不過一覲奉清光於頃刻之際在內迭見者動踰朞年應故事於一二之劄精神悃悃未甚交孚蓋已蹴踏趨出矣賢者未見顏色於何敢盡不肖者噤嚅畏縮諒不得發陛下慈愍抑又過護臣下不欲窮其不能臣恐日復一日君臣父子之際情意不接人材事類陛下尙安得而一二稔熟之乎雖陛下閱人良多立談之間可以了其平生臣愚以爲終未若至其詳之之愈也孔子語觀人之證有九曰遠使而觀其忠近使而觀其謹煩使而觀其能卒然問焉而觀其智急與之期而觀其信委之以財而觀其仁告之以危而觀其節醉之以酒而觀